

天台集

天

分

星

詳校官中書臣張姚成

助教臣常循覆勘

總校官進士臣繆琪

校對官中書臣范鏊

謄錄監生臣戴朝琛

欽定四庫全書

天台前集卷下

宋 林師蒧 編

寄河陽從事楊潛

李 涉

憶昨天台尋石梁，赤城枕下看扶桑。
金烏欲上海如血，翠色一點蓬萊光。
安期先生不可見，蓬萊目極滄海長。
田舟偶得風水便，煙帆數夕歸瀟湘。
瀟湘水清巖嶂曲，夜宿朝遊常不足。
一自無名身事閑，五湖雲月偏相屬。

進者恐不榮退者恐不深魚遊鳥逝兩雖異彼此各有
遂生心身解耕耘妾能織歲晏飢寒免相逼稚子才年
七歲餘漁樵一半分渠力吾友從軍在河上腰佩吳鉤
佐飛將偶與嵩山道士期西尋汴水來相訪見君顏色
猶憔悴知君未展心中事落日驅車出孟津高顏共嘆
傷心地洛邑秦城少年別兩都陳事空聞說漢家天子
不東遊古木行宮閉煙月洛濱老翁年八十西望殘陽
臨水泣自言生長開元中武皇恩化親霑及當時天下

無甲兵雖聞賦斂毫毛輕紅車翠蓋滿衢路洛中歡笑
爭逢迎一從戎馬來幽薊山谷虎狼無捍制九重宮殿
閉豺狼萬國生人自相噬躐躑瘡痍今不平干戈南北
常縱橫中原膏血焦欲盡四郊貪將猶憑陵秦中豪寵
爭出羣巧將言智寬明君南山四皓不敢語渭上釣人
何足云君不見昔時槐柳八百里路旁五月清陰起只
今零落幾株松枯根半死黃河水

宿恰幘精舍

任翻

絕頂新秋生夜涼
鶴飛松露滴衣裳
前峰月照半江水
僧在翠微開竹房

宿桐柏觀

飄飄雲外客
暫起宿僊堂
半夜人無語
中宵月送涼
鶴歸高樹靜
螢過小池光
不得多時住
門開世事忙

台州早春

微雨夜來歇
江南春色回
已驚時不住
還恐老相催
人好千場醉
花無百日開
豈堪滄海畔
為客十年來

贈靈澈師

靈 一

禪師來往翠微間
萬里千峰到剡山
何時共到天台寺
身與浮雲處處閑

天台山華頂峰

靈 澈

天台衆峰外
華頂當其空
有時半不見
崔嵬在雲中

題王喬觀傳道士所居

靈 一

王喬已去空山觀
白雲只今凝不散
壇場月路幾千年
往往笙歌下天半
瀑布西行過石橋
黃精採根還採苗

忽見一人擎茶碗蓼花昨夜風吹滿自言住處在東坡
白犬相隨邀我過松間石上有棋局能使樵人爛斧柯

題寒山巖

寒山

重巖我卜居鳥道絕人跡庭際何所有白雲抱幽石住
茲凡幾年屢見春冬易寄語鐘鼎家虛名定無益

登陟寒山道寒山路不窮谿長石磊磊澗濶草濛濛苔
滑非關雨松鳴不假風誰能超世累共坐白雲中

題石橋

迥聳霄漢外雲裏路峒堯瀑布千丈流如鋪練一條下
有棲心窟橫安定命橋雄雄鎮世界天台名獨超

天台寺

拾得

自從到此天台寺經今早已幾冬春山水不移人自老
見他多少後生人

送人遊天台

李洞

行李一條藤雲邊曉叩冰丹經如不謬白髮若為能淺
井山人鏡明珠海客燈乃知真隱者笑就漢庭徵

歧下送蒙上人歸天台

崔塗

坐徹秦城夏行登越客船去留那有著語默不離禪葉
擁臨關路霞明近海天石橋雲畔樹應老舊房前

寄天台葉尊師

王貞白

師住天台久長聞過石橋晴峰見滄海深洞徹丹霄採
藥霞衣濕煎芝古鼎焦念余無俗骨頻與鶴書招

天台瀑布

曹松

萬仞得名云瀑布遠看如織挂天台休疑寶尺難量度

直恐金刀易剪裁
噴向林梢成夏雪
傾來石上作春雷
欲知便是銀河水
墮落人間合却回

寄天台僧

許棠

赤城霞外寺
不忘舊登年
石上吟分海
樓中語近天
重遊空有夢
再隱定無緣
獨夜休行道
星辰靜照禪

題中巖寺

周朴

浮世師休話
晉時燈照岩
禽飛穿靜戶
藤結入高杉
存沒詩千首
廢興經數函
誰知將俗耳
來此避譚讒

題桐柏觀

東南一境清心目有此千峰插翠微人在下方衝月上
鶴從高處破烟飛岩深水落寒侵骨門靜花開色照衣
欲識蓬萊今便是更於何處學忘機

宿國清寺

周 賀

即僧清
塞也

一宿五峰杯渡寺虛廊中夜磬聲分疎林未落上方月
幽澗忽生平地雲高鳥背泉生靜景遠人當燭想遺文
暫來此地歇勞足望斷故園滄海濱

題桃源僧

陳光

桃源有僧舍跬步異人天花亂似無主鶴鳴疑有仙軒
廊明野色松檜濕春烟定擬辭鹿境依師過晚年

畫松

釋景雲

畫松一似真松樹且待尋思記得無曾在天台山上見
石橋南畔第三株

瀑布寺貞上人院

鄭巢

林疎多暮蟬師去宿山煙古壁燈薰畫秋琴雨潤絃竹

間窺遠鶴巖上取寒泉西嶽莎房在歸期更幾年

泊靈溪館

孤吟踈雨絕荒館亂峰前曉鷺棲危石秋萍滿敗船溜
從華頂落樹與赤城連已有求閑意來期在暮年

送象上人還山中

竹錫與袈裟靈山笑暗霞泉痕生淨蘚燒力落寒花高
戶閑聽雪空窓靜擣茶終期宿華頂須會說三巴

春日次錢塘却寄台州姚中丞

杜荀鶴

豈謂無心求上第難安帝里為家貧江南江北閑為客
潮去潮來老却人兩岸雨收鶯語柳一樓風滿角吹春
花前不獨垂鄉淚曾是朱門寄食身

登天台寺

一到天台寺高低景旋生共僧岩上坐見客海邊行野
色人耕破山根浪打鳴忙時向閑處不覺有閑情

寄臨海姚中丞

夏辭旌旆已秋深永夕思量淚滿襟風月易斑搜句鬢